



## Terenga 4: Hōtaka 28 - I te korenga o...

### He Mihi

E oke nei tātou ki te whakaora i te reo o kahika mā, anō he mangō tāeo i te moana nui. Kei mate tarakihi, kei mate wheke, e hoa mā. He mahi nui te karo i ngā whakawai o te wā. Kia ū, kia māia!

### Hei Mahi Whakarongo

E whai ake nei te whakamārama a Te Pairi mō tētehi whakataukī. Tēnā whakarongo ki āna kōrero, ka whakautu ai i ngā pātai nei:

- 1) He aha te tikanga o te whakataukī?
- 2) Me aha te tangata e ora ai te tinana ā te wā ka tauria e te kaumātuatanga?
- 3) I mārama te tama ki ngā kupu a tana matua?

Kia tahuri tātou ki te whakarongo ki te whānuitanga o ngā huatau o Te Pairi Blake.

### He Whakamārama

Tirohia ngā taurira e whai ake nei:

1. I te korenga o Mere i te hui, ka poto te hui.  
[Nā te mea kāore a Mere i te hui, ka poto te hui.](#)
2. I te korenga o Mere i whakaae, ka raru tana hoa.  
[Nā te mea kāore a Mere i whakaae, ka raru tana hoa.](#)

Anei te anga o te whakatakotoranga nei:

<b>I te korenga o</b>	<b>[kaupapa]</b>	<b>i + tūmahi...</b>	<b>[te hua ka puta].</b>
I te korenga o	te hui	i tū	kāore te take i tohea.
I te korenga o	ōku	i haere	ka mokemoke taku hoa.

<b>I te korenga o</b>	<b>[kaupapa]</b>	<b>i + tūāhua...</b>	<b>[te hua ka puta].</b>
I te korenga o	rātou	i harikoa	ka āwangawanga te iwi.
I te korenga o	te reo	i ora	ka ngaro ngā hītori.

<b>I te korenga o</b>	<b>[kaupapa]</b>	<b>i + wāhi...</b>	<b>[te hua ka puta].</b>
I te korenga o	taku hoa	i konei	kāore ia i kite i te kēmu.
I te korenga o	ōna	i te marae	ka tū te teina ki te kōrero.

### Hei Mahi

Panonihiā ngā rerenga kia whai kē i te whakatakotoranga o runga ake nei.

1. I te mea kāore koe i reira, i takeo te mahi.
2. Nō te mea kāore a Pita i whāki mai, i haere kūare atu au.
3. I te mea kāore rātou i ako i te reo, kua angiangi te paepae.
4. Nā te mea kāore mātou i hinga, i whakawhiwhia ki te tohutoa.

### Whakautu:

1. I te korenga ōu i reira, i takeo te mahi.
2. I te korenga o Pita i whāki mai, i haere kūare atu au.
3. I te korenga o rātou i ako i te reo, kua angiangi te paepae.
4. I te korenga o mātou i hinga, i whakawhiwhia ki te tohutoa.